

尚

綱

堂

集

尙絅堂詩集卷八

陽湖 劉嗣綰 醇甫

禪榻集 丙午

維摩示疾禪榻爲緣苦無却病之方微悟養生之旨
知我者其在藥爐經卷中乎

正月初八日雪

掩閣聽春雪迢迢清漏沉每逢新歲淺翻恨故園深竹樹
團樂話梅花冷淡心擁爐寒絕處愁坐畫灰吟

郊居

託跡與世遠委身同物遷山林非云癖愛此幽居偏春郊
有餘姿綠樹生浚烟行行繞廬舍日入人亦還明月先我

歸候我柴門前道書懶更讀時復石上眠誰能攬世慮坐
乘逍遙年

澄江舟中讀秦姑齋先生楚中集

春江一曲畫屏風盡日高歌拓短篷結興三閭香草外樓
心十老碧山中清吟我欲登秦望秀句天教壓楚雄先生以滇

之楚雄寄去官歸

記別先生顏色好微雲堂上月冥濛

郭外晚歸

扶醉歸來不自持疎籬小岸意遲遲野花過雨有殊色村
綠生烟無定姿雁路界天真入畫鴉聲墮地似催詩接攤
倒著從吾好誰向高陽問習池

雪霽

十日青鞋不出城
爐烟作伴可憐生
春陰牕戶通花氣
雪霽園林上鳥聲
偶借清閒消潔癖
翻因文采薄時名
愁懷無計能料理
禁得餘寒要酒兵

湖上別松崖

分手碧天遠
曠然離思深
孤雲千里色
獨鳥五湖心
漠漠苔衣古
蕭蕭柳髮森
欲將圖贈別
水墨點雲林

夜牕遣興

疎籬曲檻任橫斜
三逕風流仲蔚家
千日酒懷酬竹葉
一年詩債負梅花
輕烟出樹傳紅蠟
遠水搖天上綠紗
休傍鄰牆踏殘月
夜深驚起未栖鴉

山行

翠微隨步上落日半山明竹際來烟直松梢去路橫寒樵
侵燒色夕梵學潮聲靜對禪關坐林陰曖曖生

雨後憩溪山第一樓

雨過巖氣虛冷風有餘善適來湖上坐及此山中晏愁從
澹白生意與孤紅歛門前春欲盡况復溪聲變耿懷猶昔
歡流目迺今緬靜極對茶甌悠然墮花片

別恨

別恨兼風絮春城不斷飄江頭烟漠漠沙際月迢迢水枕
憐漂泊霜簾厭寂寥朝來芳草色綠遍幾長橋

五里湖春泛

東風吹帆輕似箭人影如雲走湖面峰頭日脚平燕來船

牕恰對孤村開村中樹色綠成雨饅餉家家聞笑語碧水
聲中一笠行青山影裏雙鋤舉停橈小立思提壺亂流欲
渡舟子呼兩行沙鳥忽驚散等閒誤却桃源圖

遊某氏園

一逕轉虛壑山房開翠微鳥從深樹喚人與雜花飛供奉
烏紗帽叅軍白紵衣他年此招隱珍重故園薇

春盡日晚眺

飛花隨夢過溪東凭遍闌干爲好風客思遠連芳草綠春
心留與杜鵑紅三蕉酒薄千愁極一瓣香銷百劫空綺語
漸刪才漸減更無詞賦託驚鴻

初夏春申澗小憩

亭午入深谷日高烟更低萬緣靜如夢驚禽時一啼屏念
息衆賴歛懷集孤栖望古亦已遙安知路東西嵐光在石
壁林影橫丹梯廻風有餘悲飛花出前谿山靈倚余鑑來
者徒萋迷

溪晚

散步不知極溪流相與尋烟雲今昔態花柳晦明心小酌
移寒坐清暉戀夕吟芳時猶好在所苦變園禽

有恒道院

蕉竹一相洗四山風灑然寫影兼寫聲聽此虛壑泉寺門
閉空寂客至無世緣草色綠滿庭枯時同是禪希真廻離
垢取靜能入元石床聊可栖鶴夢松陰圓

舟中午興

碧山如畫補清遊
好趁涼陰一繫舟
蝶夢不知風日午
蟬聲先帶水雲秋
荷傾小蓋初離岸
柳脫餘棉更上樓
湘簾閒鋪三兩尺
徑思移枕對江鷗

惺石老人屬題畫冊

疊嶂羅衆烟峯峯足清賞中有蛟龍吟波濤
擎奇響夏山烟靄
林壑吹古香丹房白雲繞天際飛泉來精簾
卷秋曉晴岩觀瀑
天風湧翠來堆上萬松頂了了夕陽間藤蘿
挂圓影萬松登翠
山亭鎖嬋娟風竹兩窈窕坐看石筍生枝枝
出天表竹塢涼雲
孤村不逢人一步一清絕埽取石床空眠琴
抱蘿月石燈
古木叅碧天烟光淨如染鴉點墨零星詩情
畫中遠疎林遠岫

渡口尺幅綃秋霜醉楓樹一葉紅蜻蜓飄飄不曾住晚秋林渡

茅屋三兩家村荒漸離郭時有落帆來踈鐙帶林薄夜浦歸舟

天光壓長隄晴雪澹於霰不見蘆中人濛濛落空鴈晚蘆洲景

溪山成片段鷺白欲無影日暮唱楓江歌聲裊竿頂楓江釣艇

開林面寒山山骨瘦立壁疑是臨臯亭江聲一千尺峭寒崖壁

積雪峰外峰不知峯遠近木末橫霽烟分明露樵逕遙山積雪

山行遇雨

出山復入山山深及秋淺微雨衣上來暮靄忽已歛行行

蒼磴滑取逕愜幽踐嵐光借石藏樹色因霞顯清遊苦未

極歸興聊復遣望斷暝烟生荒雅兩三點

晚登燕子磯

蓮臺天半湧一磬落空音樹有高秋色雲無下界心鳥啼
千壑暮鶴夢六朝深燕子飛何處懸厓自古今

清涼山寺遲友不至

松扉隨意入一半不曾關客舍已如水秋情多在山鳥穿
紅葉去僧蹋白雲還徑欲乘幽興留題認薜斑

雨興

峯巒畫中來雨脚清可數秋林不隱髮了了見平楚良晤
忽後期伊人渺江浦竹逕綠雲深叅差坐成阻

宿石林精舍

山中清磬發落葉滿空林繞砌窺蒼鼠開牕啼怪禽夜沈
千杵急秋對一燈深獨宿松齋晚悠然見道心

湖亭晚坐

日入高鳥還虛亭卧林影偶然清景遇祇覺長空永山月生夜涼湖雲結秋暝烟樹不知重琴橫綠蘿頂

訪友

秋光無片段一半在柴扉初月欲生影新寒都上衣尋山黃犢返弄水白鷗飛若問幽人蹟蒼波沒釣磯

秋雨不止庭桂零落成一絕

畫闌桂樹碧周遭十日濃陰卷翠濤誰念淮南舊詞客秋山病雨續離騷

送陳西漁之高郵

不見秦淮海蒼然水國秋蘆汀吹古雪柳岸畫新愁地有

魚租納人如鴈戶浮知君吟眺處漂泊亦風流

秋夜

星月隱檐際迢迢秋思多美人弄機杼相望隔天河鳥夢
團高樹蟲聲落淺莎闌風正淒緊惆悵夜如何

山中晚歸

買酒白雲間孤筇破暝還樵風動林壑紅葉滿秋山鄭谷
家何在蘇門嘯獨閑是誰題醉墨鴉點落松關

丹井山房

夕陽穿窈窕竹外一峯深塔影鳥孤立鐘聲人獨尋并糸
丹竈契泉印碧山心幾日梅花發從他枕古琴

養道

仙翁詩集卷之六
養道須求勝端居趣未厭風聲留暗谷岫色落虛檐野鳥
窺移楊幽花笑卷簾忘言何處悟微雨正廉纖

晚泛長蕩湖

湖波連岸長秋影在葭亂鷺頂一絲風扁舟共蕭散烟深
榜師唱日入漁商飯菰米滿陂田居人少於鴈已驚積潦
濶但覺行雲慢吾亦感勞生臨流軫清歎

渡口

渡口不知晚繫船楓樹林夕陽通望眼秋水隔傷心天地
漁歌老江湖酒病深孤懷易蕭瑟渾欲廢登臨

簡同人

故人風葉似秋至十分疎楊柳霜黃後梧桐露白初跡閑

應許掃髮亂不勝梳好約登高會園中摘晚蔬

暮出北塘

暮色暗蒼葭風帆一半斜野烟低傍水邨火遠連霞世事
日無奈窮愁生有涯爲農滋味足不敢薄田家

秋城

秋城蕭瑟興何如一片涼雲墮碧除閒對曉山如讀畫偶
拈風葉當翻書鳥貪好語深深喚蟬覺新寒漸漸踈盡日
闌干無客到桐陰竹翠總華余

落日

落日答樵唱暮山深更深白雲高士晝黃葉遠公林去鳥
有寒色來鐘無近音石床容我掃松子落衣襟

寒夕

松枝洒落竹檀欒
消得梅花四九寒
一十三回圓夜月
幾家閑在玉闌干

尚絅堂詩集卷八終

尚絅堂詩集卷九

陽湖 劉嗣綰 醇甫

竹中集 丁未

家園隙地種竹盈畝偶然得句嘯詠其間

意行

意行如畫裏晴雪兩三峯野鳥有灰色溪雲成絮容漁歌
來小艇鶴影上孤筇欲訪袁安去寒林鎖夕鐘

題醉峯畫

水墨模糊掃不開晴雲濕雨滿樓臺雲從玉洞披衣出雨
自黃山戴帽來

白雲渡佇友

曲折板橋東開門卽短篷驚漁春水上蜂獵晚花中小立
催詩雨微行側帽風所思不可見留恨送歸鴻

汪竹可以畫竹見贈走筆答之

畫竹不易工工者文與可方其作竹時一似我作我後人
有成竹能事亦稱頗苦無竹中史法與左氏左竹可好寫
生枝葉出婀娜忽見竹低頭歲寒同證果

竹可自譽其畫竹用前韻戲示

吾聞竹圓通無可無不可竹與竹可云虛心卽師我竹可
不謂然屈曲意亦頗要使放筆時落落與世左甘遭霜挫
折勿受風嬾娜移之植南山一笑由也果

佛音閣

春影如雲不入城平田一綠少人行野花都已得禪意山
鳥半能呼佛名閑搨斷碑分蘚色愛凭虛閣借松聲等閒
小李開圖畫金碧遙天上晚晴

宿邨家

信宿田家好邨童亦故人泥聲雙謝屐酒色一陶巾厭鼠
招猫鬼呼蠶祭馬神適來無箇事閑試小經綸

春日過重陽閣柬仁山王丈

眺盡春蕪未肯還停雲閑向子城灣無多地占重陽閣最
好天宜上巳山四壁丹青新畫本一家黃綺舊仙班羲皇
自在人間世卧聽松風畫掩關

近時杜鵑花盛行於南中偶見陽羨土人有染成淺

綠色者名曰賽鸚哥詩以賦之

杜鵑蜀山紅鸚鵡隴山綠二鳥爭一林得隴乃望蜀此間
稱蜀同艷奪錦城俗如何杜鵑色忽變花鳥族汝亦古帝
魂豈葬蒼梧麓驚看枝上血點點學湘竹春心固無多霧
眼渾未足再拜向東風山前同躑躅

社日東郊歸

簫鼓邨村賽社公輕陰遮斷水西東馬頭娘過埜桑綠牛
背童來山杏紅騎月更占明日雨鞭春曾說去年風無人
商略齊民術畊織分明似畫中

觀接花者有作

種桃接梅幹問桃桃不辭移梅伴桃根問梅梅不知從來

嘉樹各有性天巧胡乃人工施花開仙洞不相識花落羅浮空所思君不見梅妻桃妾俱薄命明日東風還嫁杏

山館訪友不直攜酒埜飲

白雲滿空呼帚掃山人還山苦不早獨攜鐵杖叩禪扉隨命青鞋蹋仙嶠行歌得得樵斧應泥飲荒荒瓦盆倒儘教稚子羅櫻笋還喚狙公讓梨棗梅陰隔塢口猶渴竹色連天目已飽清和風日真夷惠寒瘦林泉似郊島更無谷影辨子午安有橋名記丁卯說偈爭聽廣長舌吟詩自笑冬烘腦膏騰一枕夢遊仙徧地東風綠瑤草

獨遊慈雲寺

幽磬導行跡蛛絲懸素塵危闌三面水古樹一邊春殿宵

雲埋佛廊空月弔人曩時松桂約老鶴倘爲鄰

郭外過王槐門新宅

繚緣縈青直到家門前新水試新茶斷無人處蟲書葉微
有風來蝶弄花能絮別離除是燕強支寒瘦不如鴉幾竿
醉竹橫斜甚笑立空庭當畫叉

代行路難

行路難山高高我所思攀猿猱行路難海悠悠我所思鞭
螭虬山崩摧海決絕人間莫唱古離別堂上羊腸我百折

題寺壁

空山無人日當午寂寂虛廊竄狐鼠苔痕印出履綦新竹
粉墜來衫袖古

野步

大有支筇趣蕭然一散人看雲貪遠夢聽水惜殘春竹短
搖鸞尾松疎露鶴身幾絲天外雨不肯折風巾

答畸上人

杪櫺天半影參差敲斷元關杖一枝海嶽衣冠邀石丈東
坡笠屐伴琴師微濛柳色如中酒冷澹蘋香欲上詩應是
禪心初定日上方明月下方池

宿山齋風雨至

縠帳如烟起浪紋驚濤一片枕邊聞虛牕夜半松根走自
起燒燈照白雲

偶興

緣透江南色湖天畫不成斷橋供鳥渡孤艇讓魚行掃石
尋苔格沿隄記草名日來餐頓減梅子太酸生

湖上

不定陰晴四月天飄然巾帶出門前蕭疎檻亞千竿竹淨
妙山如九朶蓮終日聽風兼聽水此生宜佛更宜仙清言
約得支郎過畫閣爐香度小年

溪行雜題

山靜水則動動與樂意關君看信天翁在水不在山
白鷺行白蓮溪凹轉無色不是一足拳誰來畫標格
蜻蜓愛傍人生小怯風浪相隨春水船看爾到天上
青蟲能吐絲衣食一葉中可憐作繭蠶辛苦難爲功

深林翳初蟬
螳斧紛廻翔
丹成卽能轉
安得如蜩螗
蛙從科斗成
有尾忽棄置
世人勿食蛙
當識古文字

若水洞

仙語不知處
七條彈碧桐
翠深如悟入
紅盡覺緣空
魚意靜於客
鶴身高過童
石床留隙地
一枕夢冷風

虛室詩

四海一室大
化與居室中
有我此室不
虛虛不在室
亦不在我
謂我卽虛無
不可行雲逆
月如月自移
不見月性爲
雲所欺風來
水面水與風
委見適是風
所見非水風
月裴裒軒牕
爲開此中得
我不著點埃
惟希惟夷惟
靜惟默闔闔
往來惟室之
則

磨盤灣遇大風

叫絕篙師亂鴨鵝顛風陡遇此陂陀
三周路轉華不注四面帆來無定河
燕子刷衣飛下上漁人拋笠舞婆婆
誰知高卧篷牕客醉吸長鯨卷白波

門前

門前塘十里人與鷺絲分吹綠成空
水流紅入斷雲蒲生感甄女竹死弔
湘君攜得端陽酒霞邊酌夕曛

小閣

小閣洹寒雲名香日日薰山圖如錦
帶水色學羅裙偶點花闌字閒看藻
井文茶烟雜梅雨合伴篆愁君

西郭晚歸

楚興如鷗慣出城茨菇葉葉水風生櫓聲搖動月初上載
得滿船山影行

憇石門

天風湧海濤吹我松頂行飛流出其下屐底宮商鏗石門
訝然開恍惚仙者迎幽靈不可卽坐踞文楸枰旁有石圓如碁枰
藤抱蒙密瘦竹搖淒清日光互繞之盪此烟綠平梵唄天
上來衆鳥不敢聲忽然俯澗底影落潭龍驚此境難久留
我欲遺塵纓回風引身去絕壁青蓮生

晚泊西定橋

柔綠一枝櫓斷烟相往還蟬天風不定蛙地水長閒句冷
孤隄外碁枯小劫間待他橋上月留客醉漁灣

綠靜山房

隔著紅塵度小年。湘簾如水欲成烟。黑甜一枕蝶離世。綠
靜半塘魚在天。掃地愛看新果落。移琴貪就古苔眠。有時
風竹渾相語。瘦骨亭亭似浪仙。

遣瘧鬼

文帝將出門。薜收未御殿。闖然瘧鬼來。流禍及床薦。時從
魂夢裏。面目覩然見。俄看頤而長。忽復突而并。拊掌笑叔
夜。回身逃。曼倩來真信。如潮去亦勇。如箭方其寒。熱交命
只續一線。有時天地爐。特舉燧人膳。彷彿芭蕉身。化作七
輪扇。有時玉樓起。對面銀海眩。齒兵三十二。一冷風戰
凜若雪山。倒赫若火谷。燭汗若宛馬奔。喘若吳牛顫。想我

欠清吟奇句久不擅腸空百怪入膽破一身施詩魔未肯
降窮鬼竟來唁炎涼廼天意侮弄劇千變如何陰陽權忽
忽速愚賤既無道濟像口眼燿若電復無花卿詩丹墨飛
作片願汝歸化城冷然御風善清池况可居濁酒聊用勸
我神已復位汝入勿再禪行當語昌黎軒頊補汝傳

病起答雲士

樹色和烟綠過春虛堂病起又蕭晨芭蕉葉似一仙掌
蔭葡花成千佛身誰坐風簾重話舊自題月扇爲傷神隔牆
動我相思感鴨脚蕭疎當故人

秋暮至禮壇坪

闌空亞寒翠一逕雲周遭幽禽抱果來驚墮松花毛開門

足奇趣據石如猿猱綠淨花一枝水色山中高流泉韵絃
語雨過聲嘈嘈間以秋蟲言四壁皆離騷怡情自邱壑涉
想餘風濤隱几卽圖書輕烟流素毫

山行

山行無遠近步步著茅亭鬼火樹頭碧人烟樵外青村荒
猶橡栗地古自松苓撥蘚尋文字何須讀道經

宿鄒氏山樓

樓影倒空碧天風四面扶虛燈轉林壑秋夢落江湖松頂
鶴孤睡竹梢鴉亂呼愚公謂鄒愚公一盃酒何處舊黃壚

過孫蓮峯

石橋一折路三叉秋在城西處士家魚隱綠苔疑傍樹鳥

穿紅葉當看花別開詩社題今雨閒展山圖讀古華只怕
天寒到空谷蕭蕭翠袖掩籬笆

古寺

藤子落如雨秋林深幾重寺荒無佛火樓塌有狐蹤松鼠
躡殘瓦竹鷄啼亂鐘廊腰金碧畫疑是隔生逢

涼夜

風月影西堂相思夢半床水田秋吠蛤山館夜鳴蜩綠蟻
澆愁淺青蛾鎖恨長不堪羅幕底清切譜繁霜

秋齋漫題

葉樣衣裳剪未齊滿城搗練正淒淒秋邊風露梧桐下天
上樓臺蟬蛩西影好只留明月畫愁工閑借碧雲題空庭

一綠寒於水不許蕉牕獨自迷

夜泊丹陽郭外

秋來愁水復愁風夢與閒鷗共一篷
漁火祇隨潮上下
鈴如喚客西東雞聲月店連宵白
鳥語霜林破曉紅
莫問寄奴城外柳分明搔首怨飛蓬

小牕一絕

香臺色相悟真如近覺風懷漸破除
一夜芭蕉黃落盡小牕病起自封書

山居

山碧不分重歸雲第幾峯雙燈秋禮塢
一杵夜聞鐘得句風敲竹看棋露滴松
石床餘亂髮鶴夢亦惺忪

秋感詩

志士愛秋林。秋林無隱避。獨抱歲寒心。長歌浩天地。風霜
變懷緊。山水豁幽翳。中有勞者吟。悲哉此何氣。
天風落庭樹。中夜波濤生。萬蟲併一秋。瑣碎無全聲。愁端
接終古。促節難爲情。但聽階下泉。哀玉相琤琤。
衆卉爭秋園。顏色不可長。紅綠千萬林。朝來成一黃。生年
半五十。青鬢日以蒼。且開明鏡顏。毋爲怨曉霜。

寂寂

寂寂夜如何。虛堂卧病過。秋同天樣遠。葉比雨聲多。謝客
書唐韵。懷人讀楚歌。近來茅屋冷。無力更牽蘿。

落木吟

秋氣爾勿悲聽我落木吟霜鴻振哀翼空外揚遠音千壑
成一響蕭蕭無賸林寸葉不敢燒恐傷天地心造化有全
功時與元氣尋毋謂螻蟻穴不如鸞鳳陰

夜過鐘樓寺

蹋葉響層層禪扉叩不磨鬼傳三逕析佛守一龕燈新句
劃殘蘇古文披亂藤欲邀樓上月扶醉獨來登

聞九頭鳥

十月既望夜破屋風颭颭是時妖鳥來月黑聲啾啾低
復慢語淒切如有求妻子驚閉門鷄犬不敢留有客向我
言此鳥名九頭空中下陰血一一如贅旒或言召鬼車載
鬼天上遊力能抽人筋牽掣作鬼囚從來天地間輪轉不

得休惡物亦物化。卵此必有由。得無廉與來。不然古量尤。
一劫墮萬世。鬼哭天爲愁。方今天宇清。陽烏照窮陬。恩勤
育衆類。汝輩誰能仇。賈生賦鵬鳥。韓子歌鵩。會當駕長
風。驅出大九州。

重過陶氏別業

塵網不知門。霜風黯客魂。紅桐心未死。綠柳髮全髡。壁有
留題跡。階無却掃痕。繚垣何日缺。爭得兩家墩。

斜日

斜日蒼蒼暈遠烟。踈籬墊屋不知年。蘆花鬢薄初寒夜。竹
葉頭低欲雪天。鷗鳥一生常是客。蠹魚再世可能仙。只愁
岸上寧舟處。隱隱江聲落枕邊。

信州志卷之七
秋暮過涵虛道院訪羽士不值

巾帶蕭閒甚來尋舊羽衣井空華更好闌缺字全非廟竹
神鴉散墻花鬼蝶飛當年香一炷曾此禮星妃

溪路

溪路荒如此西風斷岸哀天寒魚減臘月暈蚌添胎菰葉
晚猶戰蓼花開更開誰憐沙鳥影露宿尙徘徊

遊秦氏廢園

一徑荒烟鎖重來是獨遊樹疑伸鬼臂草欲過人頭燕矢
汙書幔蛛絲罥畫樓怕尋昏壁字棖觸隔生愁

山家

凍雲一片鶴孤飛下有幽人白板扉山果四時供鳥啄水

昔終古作魚衣便攜缸酒論醒醉閒對鑪烟悟是非黃獨
年年滿空谷此中忘却杜陵饑

野眺

落日一蒼莽行人山影前荒村牛聽笛古驛馬吟鞭領略
孤雲相評量老樹年酒帘如有意留晝次寥天

尙絅堂詩集卷九終

尚絅堂詩集卷十

陽湖 劉嗣綰 醇甫

戊己集上

戊申

語云燕知戊己守土也安時也戊申己酉間余以秋賦因輟遠遊名兩年詩爲戊己集

詠懷詩

失足不在遠出門悲路岐失言不在多片語成禍基人心各如面寡合多所離識面不識心徃徃生險巇白圭守至訓明哲可預期晉人誤蒼生清談豈其宜

抵鵲荆玉賤彈雀隋珠輕珠玉不能言何以表寸誠美女羞自獻空谷恒守貞執裾問旁觀旁觀那得明

食荼不厭苦食蔗不厭甘甘苦人共之此味我獨諳性命
本委順有美俱內含附羶而逐臭無乃俗所耽寧爲雞鶩
廉勿學鷓鴣貪

寸燭能照物何必臨秋陽寸鋏能殺人何必飛秋霜靈輒
古志士三宿留翳桑一語不敢出私爲嗟來防風寒蓬心
悲水深萍蹤傷蓼蟲避葵莖有苦將誰嘗已矣勿復道令
我摧肝腸

利劍用補履盲鏡持葢卮措置不得地茫然安所施松柏
伐作輪不如曲木枝芳蘭藉充幄不如蕭艾姿章甫豈無
用越人徒見嗤近務責奇功安貴賢知爲

韓侯瀨上匿伍相蘆中亾英雄處失意駐足知何方登山

山無梯濟川無梁前望畏獨漉後顧憂迷陽黃鵠哀鳴
來爲我裴哀翔感此不忍別攬涕沾衣裳

塵鏡不出匣安知妍與媸瀉水置瓶中安辨漚與淄漚淄
吾自辨妍媸吾自知出門見故人握手悲素絲

崑山蘊孤璞藍田產奇英晁采不外散見者誰能名一旦
遇和氏聲價重連城連城何足重所重慰蒼生豐年蔭嘉
穀上帝感精誠蔚爲廊廟寶殿設九賓迎各言相見晚何
苦久銷聲銷聲非不苦羞與碌碌爭

良馬困鹽車崎嶇上太行一步一竭蹶顧影徒徬徨道逢
伯樂來千里思騰驤置身入天廐玉勒青絲韁朝食苜蓿
盤暮飲蒲桃漿長鳴謝伯樂爲我達君王恩深不敢負願

得歸疆場

海上

鯨海金波斷六鰲鐵星移照八閩高天邊楊僕乘船下海
外孫恩棄艦逃白羽連山原將略黃金徧地是民膏世間
蟣蝨臣何許忍聽沙蟲日夜號

軍聲瓦震古長平飛語沙中亦可驚近說街亭誅馬謖遙
聞海島哭田橫老熊就道何妨卧班馬朝天祇自鳴專閫
威名古來少凱歌歸日耀銅鉦

獨孤檜歌

宣尼殿前手植檜枝葉青蒼古無對岳王墳上檜十尋霜
斧倒劈風陰森古來善惡樹如此憑弔無端到桑梓兩株

老櫓閱興亡元氣淋漓長不死皮皴骨蛻霜髯枯誰其植
者云獨孤亭亭特出烈帝廟穿冢忽傍陳司徒蕭梁舊剝
蘭陵路此樹應成再生賦換葉移柯感劫灰盤根錯節傷
孤露姚宋聲華房杜勲舊家梁棟開元春栽培已自邀君
相呵護還須仗鬼神墻陰偃卧石闌倒火入空心無寸草
破屋秋風有客歌層臺甘露何人表冰霜斲削不肯停雨
點剝落成冬青盤旋特許避兵燹拏攬徑欲驅雷霆橫來
博望乘槎地直幹無枝出天意鑿空七日混沌竅斫斷千
年夜叉臂木神不二古所封非孤非獨名安從合抱不如
孔明柏分身會作夷齊松松身柏葉竟何有只有孤根偏
不朽樂名突過秦大夫手澤偕傳唐太守

蘇州府署有櫓
相傳爲白文公

手植愛屋愛鳥人所思木名交讓樹連枝請將片石溫生碣
來寫甘棠召伯詩

偶成

白日忽如客辭我西山頭羲和整鞭去送者誰攀留下視
江河陰萬古常東流人生特如寄旦暮隨沈浮夏蟲不號
冬春鳥不吟秋昔時著作子一一歸山邱榮名不自立身
後誰爲謀少壯良可愛何暇尋煩憂

北里有豪家軒蓋日相亞熙熙臺登春渠渠屋覆夏寒暄
易翻手時命忽徂謝冥然成大暮不似疇昔夜人生本逆
旅更遞若傳舍天道常好還誰能久相借夢夢當世人何
如早觀化

野泊

梅雨漲橫塘東風泊野航村閑童讓棗徑僻女爭桑小扇
先秋薄生衣近水涼濁醪沽亦得留醉泥烟光

滇中

滇中幾處奏金饒犵鳥狔花不敢驕旄節誤傳蘇屬國旌
旗翻枉霍嫖姚玉門奉使重安鄣銅柱題名早建標今日
夜郎休自大階前干羽格三苗

兕觥歸趙歌爲趙者庭明府作

明神宗朝趙文毅公用賢疏張江陵奪情受廷杖
削籍歸里出都日潁陽許國以兕觥爲壽後易數
主歸曲阜顏氏裔孫者庭以重價購歸翁覃溪先

生作歌紀其事余爲賦此

滄江貫虹月當午醺酒中流擊鼉鼓船中何有有兕觥觥
出古人觥亦古趙公先世溯文毅一疏批鱗解圭組從看
北向泣黃麻不似西巡歌繡斧彼奇男子潁陽許祖帳都
門設尊俎爲君子壽壽以觥贈語鐫題作年譜攜歸共識
吳中物身後流傳竟齊魯鑄金客豈慕顏回銘鼎人思遵
考父命駕因尋東麓賢攜裝轉學西江賈競看趙璧終歸
趙私幸楚弓仍得楚二百年來碧燼飛三千里外朱霞吐
用自敘從此家珍什襲藏更將國史陳編數兩朝諫草付
中語孤臣一代孫謀貽厥祖文毅公孫士春以編脩効揚嗣昌奪情爲觥告廟列
廊廡客起筵前觥亦舞觥兮有耳吾語汝有酒長澆趙家

土

晚泊暨陽

風急待潮生扁舟向晚橫
春城高酒價夜市上鐙聲
計拙家何補文工世不驚
十年湖海氣誤我是浮名

簡吳南卿

散髻斜簪出世裝
倦遊心事漸頽唐
眼前且縱千場笑
胸次能容百輩狂
漫打洪厓分赤白
休逢伯樂問驪黃
羨君一事聾來好
兩部蛙聲沸草堂

南卿時病耳聾

漫思百萬買芳鄰
閑煞江湖賀季真
棋局在心還歛手
酒杯如影不離身
畫籌儘有筵前客
題柱空勞世上人
君向君山山下看
幾曾珠履弔春申

瑤山篇

澄江孔君堯山

千秋

精篆刻古今印譜多所通曉

近得一石置齋中名之曰瑤山余爲賦瑤山篇

君不見東坡雪浪詩爭工又不見米顛良嶽開屏風古人
片石留不得此癖近在瑤山翁瑤山翁六書今古文兼通
自言篆刻法遠出王山農殘碑搨岫嶼斷簡披崆峒秦與
漢與不可識翁乃心摹手印一一精磨礪因之歷五嶽遍
訪仙都蹤卽今倦遊十餘載胸中邱壑雲烟重我來申江
城五日一過從卽都之杖天台筇屨布襪行相逢席間
示我蓮花峯草堂開出青夫容孤根不三尺徹底皆玲瓏
中間更奇絕縹緲凌虛空翁言瑤山之下不可以終老卧

遊夜夜十洲三島蓬萊東仙人引我去上謁寥陽宮五步
一瓊樓對揖雙青童琅函寶笈不知幾千萬中有玉檢金
泥封傳觀片刻呼大快羲娥星宿羅心胸回頭認歸路萬
古烟濛濛齊州九點不知處何況漢柏秦時松骨青髓綠
者誰子云是偃佺之屬浮邱公華陽真人上清客鴻都道
士元門宗一時驚愕各相顧但見半空招手來蒼穹或控
元鶴鞭疑龍乘風過去如旋蓬而翁方且兀坐此山頂笑
看紅日光曠曠吁嗟乎瑤山翁瑤山之下無終窮與君笑
入壺天中

范文正公祠

衣冠爭拜古名臣廟貌重開慶厯春一代君民有先覺千

秋憂樂見斯人舟中贈麥家風在寺裏嘗齏道味真曾向
吳山看萬笏墓門猶仰立朝身

理身一章

理身不知道坐使形神虧虧蔽且萬端愈出遂愈奇我聽
耳或遁我視目或離耳目不我用適爲天地欺日以心照
身所照乃不疲觀空得衆妙萬化無一遺悠然返天真遠
與無懷期

舟夜

風露壓篷偏披衣出暝烟星行全下水河轉不依天驛火
驚鴉起橋霜怯鷺眠郵程今夕夢漂泊已江邊

報恩寺

落日琉璃色浮空作畫屏天高上金碧地古下丹青一磬
潮首答千鐙樹影停只愁燐未滅佛火黯星

晚過雨花臺

擲拂空中笑劫灰青鞋踢遍草烟堆臺城送過西天佛又
送西山老佛來

斷磬零鐘出上方金川門事最茫茫路旁自拜前朝碣瓜
蔓傷心滿夕陽

清涼山

忽與翠屏立天空開素襟白雲終古意清磬六朝音落日
明荒堞寒潮動遠林年來蕭散感強半爲登臨

寺夜

一枕招提宿經聲杳不聞佛鐙然暮雨仙磬濕秋雲曲逕
苔痕合重門樹影分旃檀無客到寂寞證元文

偕同人遊攝山憇千佛林

青蓮何亭亭天半搖圓光一花一世界鑿空成空王金身
出丈六小者恒沙量仙梯接杳渺鬼斧窮毫茫我聞開山
祖妙手推仲璋眼見祇樹林閱盡千滄桑羅漢五百家一
一辭蕭梁銅仙滴酸淚石骨都青黃峯迴轉幽壑迤邐開
丹房洞天劃瑣碎星宿懸丁當禽言雜清梵草氣交空香
孤僧揖我去隔竹穿斜陽一片泥金雲吹墮幽人裝攬身
飛閣外撒手驚崖旁風鈴學秋語喚客尋歸廊

太古堂

谿聲與山色中有太古詩開軒日晏坐穆若羲皇時栖情
俯空潭淵想常在茲清風灑然來竹樹紛參差烟光有餘
綠學我秋眉姿一磬動幽魄孤雲賁遐思揭來願行樂邈
與神仙期

登最高峯

樵聲天末起一半入長松擲得客中客坐看峯外峯潮音
千古瀑樹色六時鐘我欲尋鸞鶴仙人不可蹤

萬松山房

羣峯湧翠來身落萬松頂夕陽挂空壁了了見圓影幽人
歎山扉綠破半房暝一夢石床空淙雲度高嶺

龍潭道中別李肅岩

客中送客一銜杯帽影鞭絲故故催行過長亭各分手萬
蟬聲裏亂山來

郊外暝行

谷響應驚弓秋高落塞鴻獸雲埋碣黑狐火出山紅橫槩
自無敵請纓誰有功悲來同阮籍石礙路西東

短歌行

短歌如何歌聲不長采采離菊難爲飢腸繁霜四下落葉
不已憂來無端中夜獨起落落者石上天爲星高接日月
飛光滄溟巨魚如山莫敢張釣鼃咳一聲河伯失笑猛虎
深居翳於林臯狐兔欲入悲風來號莫登高邱莫望遠海
決莽終古古復安在投鞭斷流磨劍倚天嗟嗟世間幾人

豪賢

江夜

月浪卷空如雪堆獨立江上之樓臺角聲初繁夜鳥起河
影欲斜秋鴈來高冠切雲自舉業羅帶拂水爭潈洄故人
今夕宿何處烟樹接天帆亂開

重陽日感興簡彥佐兄

一別九重九開軒風雨涼相看如隔世不信已還鄉聽雁
空回首聞蛩易斷腸夜來秋夢好依舊繞西堂

郊居雜詩

秋水郊園路柴門落照中豆花牛蹋碧豆楓葉鴈來紅小
話烏頭雨閒吟鷺頂風羨他偕隱好圖畫有龐公

世外心常遠村閒地最偏客攜花逕酒僧送草堂錢薄有
柴桑宅貧無鄠杜田桃源容我借來作小神仙

周北張南路中央位置佳看山圖別墅拜石署高齋雨過
收松笠風來護菊牌本無榮辱意隨地好安排

一畝閒田地琴書足古歡紫荷居士服黃竹道人冠手板
辭潘岳肩輿却吕安全家鷄犬在便作白雲看

小結漁家樂樵青出世情吹鐙糲楚竹汲水煮吳杭釜熟
鴻頭飯盤盛鴨腳羹閒中須領略此味敵公卿

汎宅尋溪北移家當漢西添糧留野鹿減膳待山雞嬾性
隨雲宿幽情逐水栖隣翁時見過一萍也如泥

吠犬寒如豹分明華子岡千家村杵急四壁夜鐙忙禿鼠

傳符術醫牛補藥方倦來無箇事野服夢羲皇
料理閒生計幽居興不凡澆花分小杓種藥借長鑱信步
高人屐隨身博士衫有時清嘯罷留醉倚松杉
谷口移家具行歌答暮樵靜看雲影滅閑對篆烟消選石
安茶臼分泉貯酒瓢晚來林葉脫遙映髮蕭蕭
蓑笠尋常事巾車不入城客來聊避俗親在敢逃名放鶴
開烟唱呼牛看雨畊他年歸隱計茅屋此留盟

山居雜詩

領略山居趣深深閉綠苔眞歸槩谷隱勝買沃州回藥竈
教猿守松關爲鶴開洪厓肩可拍約看小蓬萊
泉石成堅癖烟霞當遠遊吟蟲孤館晚墜果一牀秋四壁

題花塢三層記竹樓好山隨處得多事買巢由

招得清光至臨池寫楚騷種蕉移榻近剛竹放牆高身只
餘瓶鉢心都息桔槔滿襟涼綠影不似舊青袍

古壁昏於畫僧房小有天但聽潭上雨都作樹頭泉說劍
留山鬼看棋覓地仙未妨秋夢冷貪枕石牀眠

踢葉出門去飄然笠屐遊纒腰還笑鶴扣角不歌牛踞石
分松塵看雲借竹堦山樵吾與汝烟唱亦風流

小隱維摩室慵尋內景經修琴鈔舊譜買硯製新銘簞卷
湘文綠櫺排梵字青花間常荷鋤不是醉劉伶

過軸意如何閒中遠興多傳書黃耳犬取酒紫峯駝病采
千山藥狂牽一屋蘿往來人似蟻醒眼看南柯

疎慢成中散其如七不堪俸催支綠橘書遲乞黃柑野趣
閑方得交情沒始諳本來無捷徑何必問終南
浪說蓬萊骨埋名只此中磯材羞畫竹琴料泣燒桐仙去
淮南犬歸來碣石鴻看他遼海上幾輩老秋風
屋有三椽在田無二頃存豆棚談白社瓜圃憶青門興偶
偕童僕情難忘弟昆空山可終古倒枕夢乾坤

離離庭前桂

離離庭前桂結根緣堦墀金英與綠葉兩兩發華滋攀條
日盈把將以遺所思所思天一方辛苦安敢辭辛苦安敢
辭秋風來吹之顏色一以改丹心誰復知哀蟬戀舊林流
螢依故枝攀折苦不早搖落成後時持此感客心請復招

隱詩

聞蟬

誰復憐修潔風前祇獨吟
低颺齊女怨高舉楚臣心
得日豈云薄入林空自深
一枝辛苦借從覓道旁陰

山行

山行無健僕身外不辭筇
一徑穿深竹孤烟見遠松
寺荒秋草碣門掩夕陽鐘
今夜雲房宿商量第幾峰

友人書訊近况作此以答

故山芳樹盡成叢榮落心情入爨桐
卜肆有簾身合隱仙家無枕夢都空
人間識字愁科斗世外知音付鞠通
蟲鳥啁嘲猿鶴笑文章那不哭秋風

觀兩塵道人指頭畫

莊叟高寓言以指喻非指化工本自然天地一指耳道人
赤雙腳風骨託元始胸中邱壑癖脫腕喜伸紙奇花手亂
招怪樹臂橫使居然麻姑爪技癢乃若此淋漓出真宰不
許混沌死五岳走方寸三川徙尺咫夜來懸虛堂左右雜
圖史憑叅一指禪傳證悟宗旨

嚴子陵祠

紅葉富春郭舟行開畫圖星辰天上有山水世間無大澤
波還起雲臺骨竟枯何人念文叔麥飯薦江湖

謝臯羽墓

海外無天地西臺贖此身命同商義士魂傍楚騷人朱鳥

與終古白楊空向晨一編晞髮集流涕念孤臣

舟夜

帆峭五更風霜寒壓短篷落鐙漁火外欹枕雁聲中世態
看雲幻余懷悟水空昏鐘連曉角殘夢各西東

虛館

虛館風鐙影無聊坐掩關夜長愁隔世秋遠夢還山舊事
零星記新詩陸續刪泉聲寒不睡竹外響潺潺

竹初錢丈新葺分綠山房落成卽簡

年來茅屋幾同盟悟後塵緣淨後名世外無求非絕俗人
間有味是歸畊傳家書畫原三昧宦地雲山亦四明一樹
梅花數竿竹天教風雪拜先生

溪亭分得綠彎環
檢點羣芳自閉關
三徑成時留客住
一官去後似僧閑
奇懷到死終難遣
亂夢今生儘可刪
忝說錢劉舊家世
卷中商畧到名山

簡朱惺園

如此幽并氣
沉埋亦可嗟
少年曾許國
老大竟無家
名馬一千里
奇書三五車
爲君重舞劍
深夜落霜花

得西粵書偶成

重兵不用奪花門
偃纛囊弓出至尊
終見尉陀朝赤帝
舊傳昆莫主烏孫
日邊海舶金銀氣
天上雲臺帶礪恩
爲語征南諸將帥
豹韜經畧莫輕論

尚綱堂詩集卷十